

# Zakonodavstvo

Pojedine naše narodne republike donijele su nove zakone o slatkovodnom ribarstvu. Da se naši čitaoci upoznaju sa propisima tih zakona, odlučilo je Uredništvo, da sve te zakone objelodani u našem listu.

U ovom broju donosimo Zakon o slatkovodnom ribarstvu NR BiH, koji je stupio na snagu.

## ZAKON O SLATKOVODNOM RIBARSTVU NR BOSNE I HERCEGOVINE

### I — Opšte odredbe

#### Član 1

Slatkovodno ribarstvo (u daljem tekstu ribarstvo) je grana narodne privrede.

Ribarstvo obuhvata uzgoj, ulov, čuvanje i zaštitu riba, kao i unapređenje ribljeg fonda u otvorenim — prirodnim (rijeka, rječice, potoci, jezera, kanali itd.) i zatvorenim (ribnjacima i poluribnjacima) vodama.

#### Član 2

U okviru ribarstva obavlja se privredni i sportski ribolov.

Ribolov stoji pod nadzorom državnih organa.

#### Član 3

Ribe, riblja ikra, rakovi i druge životinje, koje žive u prirodnim vodama (u daljem tekstu ribe) su opštenarodna imovina.

#### Član 4

Narodni odbor sreza upravlja opštenarodnom imovinom iz prethodnog člana.

Narodni odbor sreza može predati pravo na ribolov u prirodnim vodama na svom području društvenim i privrednim organizacijama pod uslovima navedenim u ovom zakonu. Ukoliko se pravo na ribolov na određenom području ne preda društvenim i privrednim organizacijama, predaje se narodnim odborima opština.

Pravo na ribolov narodni odbor sreza predaje rješenjem koje donosi na sjednicama svojih vijeća. O predaji prava na ribolov sklapa se ugovor između sreza i odnosne organizacije kojim se utvrđuju obaveze i prava te organizacije.

Državni sekretar za poslove narodne privrede NR BiH propisuje elemente koje mora sadržavati ugovor iz prethodnog stava.

Društvena ili privredna organizacija stiče pravo na ribolov kada ugovor između stranaka bude potpisan.

Narodni odbor sreza može oduzeti od društvene ili privredne organizacije pravo na ribolov u prirodnim vodama, ako ustanovi da rade u suprotnosti sa odredbama ovog zakona i ugovora.

#### Član 5

Pod pravom na ribolov u prirodnim vodama u smislu ovog zakona podrazumijeva se pravo na lov i korišćenje ulovljene ribe.

Pravo na ribolov obavežno za sobom povlači dužnost uzgajanja i preduzimanja svih mjera na unapređenju ribarstva i organizacije zaštite riba.

#### Član 6

Upravljanje i korišćenje riboolvnih voda vrši se u skladu sa programom za sprovođenje mjera za unapređenje ribarstva.

Godišnji ulov ribe u prirodnim vodama može se kretati najviše do granice godišnjeg prirasta ribe.

### II — Privredni ribolov

#### Član 7

Privredni ribolov je uzgoj i ulov ribe u svrhu prodaje ili prerade ulovljene ribe.

Privredni ribolov može se vršiti samo na onim prirodni vodama koje za to odredi Državni sekretar za poslove narodne privrede NR BiH.

#### Član 8

Privrednim ribolovom mogu se baviti po pravilu ribarska poduzeća i zadružne organizacije.

Izuzetno privrednim ribolovom mogu se baviti i privatna lica i društvene organizacije čija se prava i obaveze utvrđuju takođe ugovorom narodnog odbora sreza i privatnog lica odnosno društvene organizacije.

Državni sekretar za poslove narodne privrede NR BiH propisuje bliže uslove za bavljenje privrednim ribolovom iz prethodnog stava.

#### Član 9

Ribarska poduzeća, zadružne i društvene organizacije kao i privatna lica za vršenje prava na privredni ribolov u prirodnim vodama plaćaju naknadu čiju visinu određuje narodni odbor sreza na posebnim sjednicama vijeća.

Izvršno vijeće NR BiH određuje koji se dio naknade iz prethodnog stava unosi u budžet sreza, a koji dio pripada fondovima za unapređenje ribarstva.

#### Član 10

U cilju proizvodnje i prodaje može se riba uzgajati u ribnjacima i poluribnjacima.

Ribnjaci su ograničeni zatvoreni prostori u kojima se uzgajaju ribe, a koji se mogu naročitim postrojenjima puniti vodom i prazniti.

Poluribnjaci su zatvorene vode u kojima se uzgajaju ribe, a na kojima ne postoje naprave za punjenje i pražnjenje vodom.

#### Član 11

Uzgojem i ribolovom u ribnjacima i poluribnjacima mogu se baviti na zemljištu kojim upravljaaju sve privredne, društvene i zadružne organizacije, kao i privatna lica na svom zemljištu.

#### Član 12

Državni sekretar za poslove narodne privrede NR BiH određuje tehnička sredstva odnosno sprave za vršenje privrednog ribolova u prirodnim vodama.

Bliže propise o uzgoju riba i o ribolovu u ribnjacima i poluribnjacima donosi Državni sekretar za poslove narodne privrede NR BiH.

### III — Sportski ribolov

#### Član 13

Sportskim ribolovom smatra se lovljenje ribe koje se obavlja određenim ribolovnim sredstvima u cilju lične razonode.

Sportski ribolov može se po pravilu vršiti u svim prirodnim vodama.

#### Član 14

Sportskim ribolovom može se baviti svaki građanin Federativne Narodne Republike Jugoslavije ako je član društvene organizacije sportskih ribolovaca i ako ima ribolovnu dozvolu.

Izuzetno, sportskim ribolovom mogu se baviti pod određenim uslovima i drugi građani koji nisu članovi društvene organizacije sportskih ribolovaca dok se nalaze na odmoru, oporavku ili bolovanju.

#### Član 15

Strani državljani koji stalno borave u Federativnoj Narodnoj Republici Jugoslaviji mogu se baviti sportskim ribolovom pod istim uslovima kao i drugi građani.

Strani državljani kao turisti mogu se baviti sportskim ribolovom ako pribave dnevnu ribolovnu dozvolu.

Članovima diplomatskih predstavništava na njihovo traženje izdaje ribolovne dozvole Državni sekretarijat za poslove narodne privrede NR BiH posredstvom Državnog sekretarijata za inostrane poslove.

#### Član 16

Državni sekretar za poslove narodne privrede NR BiH, po prethodno pribavljenom mišljenju republičkog organa sportskih ribolovaca, određuje sa kojim spravama i mamcima se može vršiti sportski ribolov.

#### IV — Ribolovne dozvole

Zabranjeno je baviti se sportskim ribolovom bez dozvole za ribolov.

Ribolovne dozvole su godišnje i dnevne.

##### Član 18

Godišnje ribolovne dozvole izdaju se sa važnošću samo za područje sreza.

Godišnje ribolovne dozvole mogu dobiti samo članovi društvene organizacije sportskih ribolovaca.

Dnevne ribolovne dozvole izdaju se sa važnošću za područje sreza ili za određenu vodu (rijeku) ili samo za jedan dio njenog vodotoka.

Dnevne ribolovne dozvole mogu dobiti članovi društvene organizacije sportskih ribolovaca, kao i lica iz člana 14 stav 2 i člana 15 ovog zakona.

Ribolovne dozvole ne mogu se prenosi ti na druga lica.

Državni sekretar za poslove narodne privrede NRBiH, po prethodno pribavljenom mišljenju republičkog organa sportskih ribolovaca, donijeće bliže odredbe o dozvolama i propisati njihove obrasce.

##### Član 19

Ribolovne dozvole izdaje nadležni upravni organ narodnog odbora opštine koja se nalazi u sastavu sreza za čije se područje izdaje dozvola odnosno na čijem se području nalazi određena voda (rijeka) za koju se dozvola izdaje.

Državni sekretar za poslove narodne privrede NRBiH može ovlastiti pojedine društvene organizacije sportskih ribolovaca da izdaju dnevne ribolovne dozvole za svoje članove za vode sa područja drugog sreza s tim, da naplaćene naknade doznače u korist odgovarajućeg sreskog fonda za unapređenje ribarstva.

##### Član 20

Za dozvole za sportski ribolov plaća se naknada.

Visinu naknade u rasponu za svaku vrstu ribolovne dozvole za područje pojedinih srezova određuje, po prethodno pribavljenom mišljenju republičkog organa sportskih ribolovaca, Državni sekretar za poslove narodne privrede NRBiH.

Narodni odbor sreza u okviru raspona iz prethodnog stava određuje visinu naknade za pojedine vrste ribolovnih dozvola, po prethodno pribavljenom mišljenju sreske organizacije sportskih ribolovaca.

Visina naknade može za dnevne dozvole biti različita za određene vode (rijeke) i dijelove njenih vodotoka.

Članovi društvenih organizacija sportskih ribolovaca kao i lica koja se nalaze na godišnjem odmoru plaćaju umanjenu naknadu određenu za dnevnu dozvolu.

##### Član 21

Nadležni upravni organ narodnog odbora sreza može uz saglasnost Državnog sekretara za poslove narodne privrede NRBiH izdati odobrenje da pojedini specijalni ugostiteljski turistički objekti mogu imati ribolovce koji će loviti ribu za potrebe tih objekata. Za ove ribolovce pri vršenju ribolova važe sve odredbe za sportski ribolov.

Državni sekretar za poslove narodne privrede NRBiH propisuje uslove za izdavanje odobrenja iz prethodnog stava.

Novčana naknada od ovih odobrenja ulazi u sreski fond za unapređenje ribarstva.

#### V — Unapređenje ribarstva

##### Član 22

Radi unapređenja privrednog i sportskog ribolova osnivaju se republički fond i sreski fondovi za unapređenje ribarstva.

##### Član 23

Sredstva republičkog fonda obrazuju se od:

- 1) dijela naknada u gotovu od svih vrsta ribolovnih dozvola;
- 2) dijela naknade iz člana 9 ovog zakona;
- 3) dijela naplaćenih šteta iz člana 37 ovog zakona;
- 4) dotacije državnih organa i drugih ustanova odnosno organizacija;

5) drugih prihoda Fonda određenih posebnim propisima.

##### Član 24

Sredstva sreskih fondova obrazuju se od:

- 1) dijela naknada u gotovu od svih vrsta ribolovnih dozvola;
- 2) dijela naknada iz člana 9 i 21 ovog zakona;
- 3) dijela naplaćenih šteta iz člana 37 ovog zakona;
- 4) iznosa koji potiču od naknada šteta počinjenih krivičnim djelima i prekršajima kršenjem propisa o ribolovstvu;
- 5) prihoda ulovljene ribe od strane same društvene organizacije sportskih ribolovaca (član 30);
- 6) dotacija državnih organa i drugih ustanova odnosno organizacija;
- 7) drugih prihoda fondova određenih posebnim propisima.

##### Član 25

Republičkim fondom za unapređenje ribarstva upravlja upravni odbor čije članove imenuje Izvršno vijeće NRBiH po predlogu republičkog organa sportskih ribolovaca.

Sreskim fondom za unapređenje ribarstva upravlja upravni odbor čije članove imenuje narodni odbor sreza na zajedničkoj sjednici oba vijeća po predlogu sreske organizacije sportskih ribolovaca.

Bliže odredbe o upravljanju Republičkim fondom propisuje Izvršno vijeće NRBiH, a bliže odredbe o upravljanju sreskim fondom propisuje narodni odbor sreza na sjednicama svojih vijeća.

##### Član 26

Fondovi za unapređenje ribarstva su pravna lica i za svoje obaveze odgovaraju svojim sredstvima.

Sredstva fondova mogu se upotrebiti isključivo za unapređenje ribarstva.

##### Član 27

Izvršno vijeće NRBiH, po prethodno pribavljenom mišljenju republičke organizacije sportskih ribolovaca, određuje svake godine u kojem dijelu učestvuju republički i sreski fondovi u sredstvima navedenim u članu 23 i 24 ovog zakona.

##### Član 28

Program za sprovođenje mjera za unapređenje ribarstva iz člana 6 stav 1 ovog zakona donosi se za područje sreza.

Sreski program donosi narodni odbor sreza na sjednicama svojih vijeća uz pribavljeno mišljenje sreskog organa ribolovaca.

##### Član 29

Radi vještačkog oplodavanja, razmnožavanja i uzgoja ribljeg mlada za poribljavanje prirodnih voda podižu se mrestilišta.

##### Član 30

Društvene organizacije sportskih ribolovaca i mrestilišta mogu vršiti ulov matičnih riba u cilju poribljavanja i proizvodnje mlada samo po odobrenju Državnog sekretara za poslove narodne privrede NRBiH.

Društvene organizacije sportskih ribolovaca po odobrenju Državnog sekretara za poslove narodne privrede NRBiH mogu vršiti izlov ciprinidnih vrsta riba u prirodnim vodama u kojima preovladavaju salmoidne vrste riba u cilju čišćenja voda od ciprinidnih vrsta riba kao i u cilju prodaje radi pribavljanja novčanih sredstava za poribljavanje voda sa salmonidnim vrstama riba.

Društvene organizacije sportskih ribolovaca kod povlačenja rijeka, poslije poplava kao i pri presušivanju rijeka, dužne su da izvrše izlov preostale ribe iz stajaće vode i da ovu ribu prenesu u rijeku.

U odobrenju iz prethodnih stavova određuju se uslovi i sredstva za ulov i izlov riba.

##### Član 31

Stručno osoblje i saradnici ribarskih naučnih ustanova kao i ostalih naučnih ustanova koje se bave istraživanjima iz oblasti ribarstva mogu za potrebe naučnog ispitivanja, uz posebnu dozvolu Državnog sekretara za poslove narodne privrede NRBiH, loviti

ribu u svim prirodnim vodama bez obzira na lovostaje, zabranu ribolova i najmanju određenu veličinu riba, sa svim ribolovnim priborom i spravama.

Na predlog naučne ustanove Državni sekretar za poslove narodne privrede NR BiH može odobriti da se radi poboljšanja bioloških uslova u pojedinim vrstama može vršiti izlov i salmonidnih vrsta riba.

#### Član 32

Pojedine dijelove prirodnih voda ili prostore pod vodom koji su naročito pogodni za plodenje i razmnožavanje riba može Državni sekretar za poslove narodne privrede NR BiH odrediti za riblja plodišta i staviti ih pod posebnu zaštitu. Državni sekretar za poslove narodne privrede NR BiH ujedno određuje način upravljanja ovim plodištima a može pod posebnim uslovima dozvoliti i ribolov u njima.

#### Član 33

Državni sekretar za poslove narodne privrede NR BiH određuje ustanovu ili organ koji će voditi katastar prirodnih voda na teritoriji NR BiH i prikupljati statističke podatke o važnosti za razvoj slatkovodnog ribarstva.

### VI — Zaštita ribolovnih voda i riba

#### Član 34

Zabranjeno je svako zagađivanje prirodnih voda otpacima u tekućem i čvrstom stanju ili materijama koje uništavaju ribu ili na nju štetno djeluju.

Zabranjeno je plavljenje balvana, drvene građe i ogrijevnog drveta na prirodnim vodama na kojima se time uništava ili ugrožava život riba. Državni sekretar za poslove narodne privrede NR BiH određuje tokove pojedinih rijeka ili cijele rijeke na kojima je plavljenje dozvoljeno.

#### Član 35

Industrijska i druga preduzeća koja upotrebljavaju vodu za preradu organskih i neorganskih materija dužna su da podignu i održavaju potrebne uređaje za hemisko odnosno biološko i mehaničko prečišćavanje upotrebjene vode prije njenog ispuštanja u prirodnu vodu.

Državni sekretar za poslove narodne privrede NR BiH, pošto prethodno komisijski utvrdi razmjere štetnog djelovanja otpadnih voda i drugih materija, određuje rok u kome se moraju izgraditi potrebni uređaji za prečišćavanje.

Državni sekretar za poslove narodne privrede NR BiH može odrediti da takve uređaje podignu i narodni odbori opština u gradskim naseljima, ako su vode tih gradskih kanala štetne po ribu.

Protiv rješenja donesenih po prethodnim stavovima nezadovoljna stranka ima pravo žalbe Izvršnom vijeću NR BiH, u roku od 15 dana po prijemu rješenja.

#### Član 36

Pri projektovanju i građenju industrijskih objekata i svih hidrotehničkih postrojenja dužni su projektanti, investitori i izvođači radova obezbijediti uređaje za slobodan prolaz ribe na njenom prirodnom putu, kao i obezbijediti uređaje za prečišćavanje otpadnih voda i preduzeti mjere da se izbjegne veća šteta po ribarstvo prilikom zagađivanja, odvođenja i ispuštanja vode, naročito kod hidrotehničkih postrojenja i tome slično.

#### Član 37

Privredne organizacije koje počine štetu svojim radom protivno članu 34 ovog zakona dužne su da naknade tu štetu.

Ako u pogledu visine štete ne dođe do sporazuma, visinu naknade određuje nadležni privredni sud na zahtjev sreza. Ukoliko zahtjev ne podnese srez, zahtjev može podnijeti Narodna Republika.

#### Član 38

Zabranjeno je:

- 1) vršiti noćni lov na salmonidnim vodama,
- 2) napasati stoku u pojedinim riječnim koritima koje odredi Državni sekretar za poslove narodne privrede NR BiH, radi zaštite ribljeg mrijesta i razmnožavanja riba,

3) loviti ribu pregrađivanjem vode, odvracanjem vode ili sprečavanjem povratka ribe sa poplavljenog zemljišta,

4) loviti ribu neposredno rukama,

5) loviti ribu vatrenim oružjem, električnom strujom i ostvama,

6) loviti ribu svim ostalim sredstvima koja nisu odobrena u smislu odredaba člana 12 i 16 ovog zakona,

7) loviti salmonidne ribe mrežama u prirodnim vodama,

8) loviti ribu u ribljim plodilištima koja su stavljena pod posebnu zaštitu (član 32),

9) loviti ribu: za vrijeme plodenja (lovostaja), ispod dozvoljene minimalne mjere, preko maksimalnog broja komada i u vodama u kojima postoji zabrana ribolova (član 39),

10) namještati sprave za lov na ribe na propustima, branama i sličnim postrojenjima,

11) unositi u vode one vrste riba i druge životinje kojih u tim vodama nema bez prethodnog odobrenja Državnog sekretara za poslove narodne privrede NR BiH,

12) prodavati i kupovati ribu koju ulovi sportski ribolovac.

13) sakupljati ikru i kvariti ili uništavati prirodna plodišta,

14) moći lan ili konoplju u prirodnim vodama van mjesta koje odredi savjet za privredu narodnog odbora opštine.

Državni sekretar za poslove narodne privrede NR BiH utvrdiće vrijeme koje se smatra kao noćni lov za pojedina godišnja doba.

#### Član 39

Državni sekretar za poslove narodne privrede NR BiH, po prethodno pribavljenom mišljenju republičkog organa sportskih ribolovaca, propisuje svake godine maksimalan broj komada dozvoljenog dnevnog ulova za sve salmonidne vrste riba, minimalne mjere za ribu u svim vodama, lovostaje i zabranu ribolova u pojedinim tokovima prirodnih voda.

#### Član 40

Radi zaštite rijetkih i prorijeđenih vrsta riba kao i u cilju njihovog razmnožavanja Državni sekretar za poslove narodne privrede NR BiH može odrediti privremenu zabranu ribolova kojom se obuhvata svaki ribolov ili ribolov na pojedine vrste riba u određenim prirodnim vodama.

#### Član 41

Lica ovlašćena da vrše ribolov i njihovo pomoćno osoblje imaju pravo pristupa mjestu ribolova i preko tuđeg zemljišta i pravo upotrebe zemljišta uz prirodnu vodu samo u širini koju neophodno zahtijeva primjenjeni način ribolova.

Ovo pravo se ne odnosi na zemljište koje je sastavni dio dvorišta i ograđenog vrta ili voćnjaka.

Vlasnik zemljišta je dužan ostaviti stazu uz prirodnu vodu za prolaz ribolovaca i lica koja vrše nadzor nad ribolovom.

Vlasnik zemljišta ima pravo na naknadu štete učinjene upotrebom zemljišta izvan određene staze. Ovlašćenik prava na ribolov odgovara i za štetu koju učini njegovo pomoćno osoblje.

### VII — Čuvanje ribolovnih voda

#### Član 42

Narodni odbori srezova organizuju i vrše na prirodnim vodama ribarsku čuvarsku službu.

Društvene organizacije sportskih ribolovaca organizuju čuvarsku službu putem društvene kontrole, a po potrebi i preko svojih čuvara.

Privredne organizacije mogu vršiti čuvarsku službu preko svojih čuvara.

Čuvani su službena lica.

Ribarsku čuvarsku službu na prirodnim vodama vrše i pripadnici Narodne milicije i lugari na području na kojem vrše svoju redovnu dužnost.

#### Član 43

Ko lovi ribu ili se nalazi sa ribolovnim priborom pokraj vode na zahtjev ribarskog čuvara mora pokazati ribolovnu dozvolu, ribolovni pribor i ulovljene ribe.

#### Član 44

Bliže propise o organizaciji, djelokrugu, rad i ovlaštenjima ribarske čuvarske službe propisuje Državni sekretar za poslove narodne privrede NRBiH i Državni sekretar za unutrašnje poslove NRBiH po prethodno pribavljenom mišljenju republičke organizacije sportskih ribolovaca.

### VIII — Vršenje inspekcije

#### Član 45

Nadzor nad izvršenjem odredaba ovog zakona i drugih propisa o slatkovodnom ribarstvu vrše republički i sreski poljoprivredni inspektori.

#### Član 46

Poljoprivredni inspektor u vršenju inspekcije ovlašten je da:

- 1) neposredno kontroliše izvršenje propisa o ribarstvu,
  - 2) kontroliše postrojenja za prečišćavanje otpadnih voda i utvrđuje zagađivanja koja nastaju bacanjem otpadaka u prirodne vode.
- Ako posumnja u štetnost otpadnih voda i drugih zagađivanja a nije u mogućnosti da sam to utvrdi, dostaviće uzorke otpadnih voda i drugih materija odgovarajućoj ustanovi na ispitivanje da ona to utvrdi,
- 3) podnosi prijavu nadležnim organima radi pokretanja postupka kada utvrdi da nepravilnost predstavlja krivično djelo ili prekršaj,
  - 4) preuzima sve radnje koje se ukazu potrebnim radi otklanjanja neposredne opasnosti za uništavanje riba.

#### Član 47

U vršenju svojih ovlaštenja poljoprivredni inspektor donosi rješenje.

Protiv rješenja sreskog i republičkog poljoprivrednog inspektora može se izjaviti žalba Državnom sekretaru za poslove narodne privrede NRBiH u roku od 5 dana od dana prijema rješenja.

Žalba ne odlaže izvršenje, ali organ koji je donio prvostepeno rješenje može, na osnovu obrazloženog zahtjeva žalioca, odložiti izvršenje.

#### Član 48

Javni tužilac kome je podnesena prijava dužan je podnosioca prijave obavijestiti o ishodu krivičnog postupka i postupka pred privrednim sudovima, a sudija za prekršaje je dužan podnosiocu prijave dostaviti primjerak svog rješenja.

### IX — Kaznene odredbe

#### Član 49

Privredna organizacija kazniće se novčanom kaznom do 1.000.000 dinara ako:

- 1) vrši privredni ribolov bez ugovora (član 4);
- 2) vrši privredni ribolov na vodama na kojima nije određeno vršenje privrednog ribolova (član 7);
- 3) vrši privredni ribolov sredstvima odnosno spravama koje nisu određene za privredni ribolov (čl. 12);
- 4) vrši ribolov bez odobrenja ili na račun protivan odredbi člana 21 ovoga zakona;
- 5) vrši privredni ribolov u vodama stavljenim pod posebnu zaštitu (član 32) ili u vodama navedenim u članu 40 ovoga zakona;
- 6) vrši plavljenje balvana, drvene grade i ogrijev-nog drveta na vodama na kojima plavljenje nije dozvoljeno (član 34 stav 2);
- 7) ako u roku koji odredi Državni sekretar za poslove narodne privrede NRBiH (član 35 stav 2) ne podigne, odnosno ne održava u ispravnom stanju uređaje za prečišćavanje otpadne vode;
- 8) postupi protivno odredbi člana 36 ovoga zakona;
- 9) vrši one radnje koje su zabranjene u članu 38 tač. 3, 6, 9 i 11 i čl. 34 tač. 1 ovoga zakona;
- 10) ometa i sprečava vršenje čuvarske službe (član 43);
- 11) ometa i sprečava vršenje čuvarske službe

poljoprivrednog inspektora (član 46).

Za radnje iz prethodnog stava kazniće se i odgovorno lice u privrednoj organizaciji novčanom kaznom do 20.000 dinara.

#### Član 50

Novčanom kaznom do 20.000 dinara ili kaznom zatvora do 15 dana kazniće se za prekršaj ko:

- 1) vrši privredni ribolov na vodama na kojima nije određeno vršenje privrednog ribolova (član 7);
  - 2) vrši privredni ribolov bez ugovora (čl. 8 st. 2);
  - 3) lovi ribu sredstvima odnosno spravama koje nisu određene za ribolov (član 12) ili sredstvima odnosno spravama koje nisu određene za sportski ribolov (član 16);
  - 4) lovi ribu bez dozvole za ribolov (član 17);
  - 5) prenese svoju dozvolu na drugo lice (član 18);
  - 6) izdaje dozvole za ribolov protivno odredbama člana 19 stav 2 ovoga zakona;
  - 8) lovi ribu u vodama stavljenim pod posebnu zaštitu (član 32) ili u vodama navedenim u članu 40 ovoga zakona;
  - 9) vrši ma koju od radnji koje su zabranjene u članu 38 ovoga zakona;
  - 10) sprečava upotrebu zemljišta na način predviđen u članu 41 ovoga zakona;
  - 11) ometa i sprečava vršenje čuvarske službe (član 43);
  - 12) ometa i sprečava vršenje inspekcije od strane poljoprivrednog inspektorata (član 46);
- Za prekršaje iz prethodnog stava društvena organizacija kazniće se novčanom kaznom do 50.000 dinara.
- Za radnje iz stava 1 kazniće se i odgovorno lice društvene organizacije novčanom kaznom do 20.000 dinara.

#### Član 51

Postupak za radnje predviđene u članu 49 ovoga zakona vode nadležni privredni sudovi.

Administrativno kazneni postupak po prekršajima predviđenim u članu 50 ovoga zakona vodi se po odredbama Opšteg zakona o prekršajima.

#### Član 52

Sa rješenjem o prekršaju može se pored kazne izreći kao sigurnosna mjera oduzimanje ribolovnih sprava i drugih sredstava i ulovljenih riba koji su predmet prekršaja.

Čuvar ribolova odnosno lice koje vrši čuvarsku službu može od izvršioca privremeno oduzeti predmete iz prednjeg stava, ako ga zateče na djelu.

Po izvršnosti rješenja o kazni oduzeta sredstva i pribor prodaje se putem licitacije, a dobiveni novac uplaćuje se u korist sreskog fonda za unapređenje ribarstva.

Riba ulovljena u vrijeme lovostaja ili koja je ispod dozvoljene veličine vratiće se odmah na licu mjesta u vodu ako je živa, a ostala riba ulovljena protivno odredbama ovog zakona odmah će se prodati. Novac dobiven prodajom ribe uplaćuje se u korist sreskog fonda za unapređenje ribarstva.

### X — Prelazne i završne odredbe

#### Član 53

Upravljanje ribolovnim prirodnim vodama i njihovo korišćenje saobraziće se odredbama ovog zakona najdalje u roku od tri mjeseca od dana stupanja na snagu ovog zakona.

Dozvole za privredni ribolov izdate do dana stupanja na snagu ovog zakona ostaju u važnosti dok se saglasno odredbama ovog zakona ne donesu predviđeni akti, a najdalje do roka predviđenog u prethodnom stavu. Dozvole za sportski ribolov izdate po ranijim propisima ostaju u važnosti do 1 marta 1956 g.

#### Član 54

Danom stupanja na snagu ovog zakona prestaje da važi Zakon o slatkovodnom ribarstvu (»Službeni list NRBiH« broj 6/50).

#### Član 55

Ovaj zakon stupa na snagu danom objavljivanja u »Službenom listu NRBiH«.

(Objavljen u Službenom listu NR BiH dne 30. XII. 1955. u broju 29./1955. god.).